

Lutino weng romo Pwonye

Dul lwod me pwonye wa me abic: Goro ma mako kit latin (dano) dok miyo latin bedo kekene, loko kekene ki bene maro bedo laling (Autism)

Glades: Itye ka winyo dul lwod me pwonye wa me *Lutino weng romo pwonye*. *Lutino weng romo pwonye* Jo ma kelo botwu aye **Backup Uganda** kacel ki **Brainstud**. Itwero winyo pwonye wa ni ki wiyamo me **internet** ma tye i wang **website** wa ma kilwongo ni www.backupuganda.org. Ka i tye ka winyo wa ki Gulu, i romo gamo pwonye man macalo dwan ma ki mako ki i Mega FM, onyo i Divine Video & music library matye i dye boma kany, ki bene i gangi kwan magi, Highland Primary School i yoo Kitgum, Gulu Prison Primary School i yo Lacor ma opime ki ot lega Holy Cross, i Gulu Town Primary School ma tye i yo Gulu University, nyo i Mary Immaculate Primary School i nge gang lega madit pa Katoli ma kilwongo ni Cathedral ma tye i For-God, St Joseph's Primary School onyo Christ the King Demonstration Primary School i nge gang kwan Sacred Heart.

Ka i nen i maro dul lwod me pwonye wa man, bed agonye me nywako-ne ki lupaco ni, luremi ki jirani ni bene. Ka dano madwong guwinyo pwonye i kom kit goro ma yelo lutino i kwan, ci waromo konyo lutino wa maber loyo!

Glades: Wajolo-wu ka winyo dul lwod me pwonye wa me abic me *Lutino weng romo pwonye*. Pwonye man neno yoo me konyo latin acel acel wek obed ki kony weng ma mite pi kwan mamege- kadi bed ni tito lokke tek.

An laloki nyinga Glades, atye macalo lapwony i dul me Backup Uganda. Tin, atye ki lawota. Toolit, Toolit i romo nyute bene

Toolit: Apwoyo Glades. An nyinga Toolit, atye latic me Backup Uganda bene. I dul lwod me pwonye wa man me abic me *Lutino weng romo pwonye*, wabinywako mapol i kom goro ma yelo lutino i kwan ma kilwongo-ni goro ma mako kit latin (dano) dok miyo latin bedo kekene, loko kekene ki bene maro bedo laling (Autism)

Glades: I dul lwod me pwonye wa ma okato, wa neno lok i kom goro ADD (ma tye Attention Deficit Disorder) ki ADHD (ma tye Attention Deficit Hyperactivity Disorder) matut: wa neno ngo ma gin obedo, ngo ma kelo goro magi, lanyute ki yoo ango ma waromo konyo kwede lutino matye ki goro meno. Ka pe i winyo dul lwod me pwonye wa ma okato ni, ci pud i romo nongo wa i wiyamo me **internet** matye i wang **website** wa ma kilwongo ni www.backupuganda.org, nyo, i romo gamo dul lwod me pwonye magi macalo dwan amaka ki i Mega FM, onyo kama ki poko iye wer ki jami lagal wang ki wer i Divine Video & music library matye i dye Boma kany, ki bene i gangi kwan magi, Highland Primary School i yoo Kitgum, Gulu Prison Primary School i yoo Lacor ma opime ki ot lega Holy Cross, i Gulu Town Primary School matye i yoo Gulu University, onyo i Mary Immaculate Primary School i nge gang lega madit pa Katoli ma kilwongo ni Cathedral matye i For-God, St Joseph's Primary School onyo Christ the King Demonstration Primary School i nge gang kwan Sacred Heart.

Pi nino matin kong dok wanywak man ma kilwongo ni goro ma mako kit latin (dano) dok miyo latin bedo kekene, loko kekene ki bene maro bedo laling (Autism)

Toolit: Goro ma mako kit latin (dano) dok miyo latin bedo kekene, loko kekene ki bene maro bedo laling, pol kare dano niang iye calo obedo goro ma yelo kit ma wabedo kwede dok wanywako bene ki luwot-wa ki timo jami mogo kare ki kare/nwoyo gin acel cawa weng. Twatwalle, man romo bedo ayela yela i dongo pa latin ma miyo gidongo mot i kit me timo jami mogo onyo bene gik woko licwek i kor yoo ma nongo peya kare gi otum. Man pol kare time malube ki kit ma latin bedo kwede ki luwote onyo dano mukene, kit ma latin loko kwede ki bene tiyo ki dul kome mukene katye ka lok, labole, ka i nen latin nyutu kit mogo ma pe opore. Lawota Glades obimiyo labol mapol.

Bedo ki goro ma man, pe dong tyene ni in pe i romo lok/bedo ki luwoti onyo dano mukene. Ka i nen latin nyutu lanyut ma weko en bedo kekene, loko kekene ki bene maro bedo laling, kakany en aye omyero i cak tamo yoo ango ma i romo konyo kwede ki latin man i kom goro ne, ngeyo kabedo mene ma latin man romo bedo agoya iye kun konyo lweny i kom goro matye ka ye. Man dong kelo wa kawaco ni, bedo ki goro mo pol kare obedo kit ma dano neno kwede ki latin moni dok bene meno nen ki bot jo mogo manok ki i kabedo wa. Kong waketo ni, ka onongo dano weng ki nywalo-gi labongo tyen dok gi tiyo ki lela ma konyo wot bot jo matye ki ngolo, ki dong

dano manok aye ki nywalo gi ki tyen dok giwoto. Ci wutamo ni waromo keto ni jo matye ki tyen gi ni aye jo matye ki goro?

Glades: Kit macalo wanywako kwede i dul lwod wa me pwonye mapol ma okato ni, pire tek pol kare me ngeyo ni, pe lutino weng ma nyutu onyo tye ki lanyut me goro man dong romo bedo ki goro macalo meno. Labole, lutino matye ki goro ni pol kare gimaro tuku keken-gi me ka tuku ki luwot gi. Meno keken pe romo weko wamoko ni latin moni dong tye ki goro ni, myero obed lanyut mapol ma otore kacel i kom latin.

Ma pud peya waloko i kom lanyut, amito ni kong wiwa opo ni watye ki lok onyo kwayi lok ma pol ma pe opore dok pe konyo ma wan wamaro tic kwedgi me lwongo lutino matye ki goro mapatpat ma i kine en aye bene goro ma weko latin (dano) bedo kekene, loko kekene ki bene maro bedo laling. Jo macalo meno pol kare dano bolo lok i kom-gi, pien kit gi pat ki kit lutino mukene. Magi pe obedo leb ma opore dok konyo, makato ne ka i neno lutino mapol matye ki goro ma weko latin (dano) bedo kekene, loko kekene ki maro bedo laling bene ginyutu kwayi labol mabeco mapol mada. Miti-wa madit i dul lwod me pwonye eni tye me konyo wu niang i kom goro man, wek wan ducu wanyut labol maber ka wakonyo lutino matye ki kit goro man.

- **Kit lanyut (Rac ki Ber)**

Toolit: Macalo goro mukene, goro ma mako kit latin (dano) dok miyo latin bedo kekene, loko kekene ki bene maro bedo laling (Autism) bene tye ki lanyut ma konyo weko ngeyo ne yot katye i kom latin, kadi bed ni lutino mukene nyutu lanyut makato lutino mukene woko. Kong dong wa wanywako i kom lanyut mapatpat wek wabed ki kare me niang gi maber. Gin ma myero wange i kom lanyut magi, en aye lanyut magi nyute dok niange ka waloko onyo maro lok ki luwot-wa, ki bene myero onyute kare weng pe tyen acel onyo aryo keken. Bot lutino mukene, goro man bedo marac matek, ki bot lutino mukene, pe dok bedo rac twatwal. Bot lutino ma dok nongo pe rac twatwal pole aye cwalo kare wek wange ento watye ki lutino magi i pol ot kwan-wa. Watye ki lanyut i dul adek mapatpat ma nyutu lanyut ma lutino matye ki goro meno nyutu. Wabicako ki ma loko i kom kit ma miyo lutino bedo kekengi, loko kekengi ki bene maro bedo laling.

Goro ma miyo latin bedo kekene, loko kekene onyo bene maro bedo laling

- Man tye i kin goro ma walwong ni goro ma nyute ma pe aa ki lok onyo kit ma ngat moni loko kwede. Man obedo lanyut ma nen pe ki lok ento ki i kom ngati mo. Man romo bedo lworu wang dano. Lutino matye ki goro man pol kare gilworo wang dano ka kitye ka lok kwedgi kama i nongo ni giromo gak ka neno malo, kadi bed ni ngat matye ka lok kwedgi tute me neno wang-gi atir-atir. Ento, ka i loko ki latin ma gak ka neno cen kun pe neno wangi atir, pe dong omiito i mok ni latin macalo man tye ki goro meno pien latin romo bedo ma lwor bene ma nyutu ni pe gi twero bedo ki goro meno. Lanyut mukene bene kany romo bedo; lutino matye ki goro man pe gimaro ni ki gud dul komgi mo keken, lutino man bene pe gipwoyo ka ki gudu dul kom gi keken. Pe gimaro man kulu dok gi keco oyot labole ka i mako gwok-gi ka i tye ka lok onyo wot kwedgi.
- **Glades:** Goro mogo ma nyutu nia i kit dano mapat ki lok kube ki lanyut mukene; goro ma miyo dano bedo macalo kumu kumu kun pe nyutu yomcwiny mo bot dano mukene; Lutino matye ki goro ma mako kit latin bedo kekene, loko kekene ki bene maro bedo laling pol kare ginongo tek mada me niang dano nia ki wang gi, labole, ma weko bedo tek me moko kit me gamo lok ma ngat moni tye ka loko ne. Jo matye ki goro man bene gin kikom-gi pe ginyutu gin nia i kit ma wang-gi nen kwede, man weko tek mada ki ngat mo me niang miti gi nia i wang. Ento man bene pe kit acel ki lutino weng matye ki goro meno. Me dolo doge, moko yomcwiny ki keco tek mada ki bot lutino matye ki goro meno. Pe gimaro nyutu yomciny-gi onyo keco kamaleng kadi wa-nyutu mit-gi bene. Gimaro loko lok atyer labongo paro kit ma ngat moni tye ka winyo kwede, kono iye yom onyo okeco..
- Goro me adek en aye obedo mako wat/larem ki bedo ki wat/larem. Lutino matye ki goro ma mako kit latin man nongo tek mada me mako wat/larem, kono lurem onyo larem i kin lacoo ki dako kadi ka gudongo. Pol-gi winyo agonya me bedo ken-gi, dok gibedo ki lurem pi tyen lok mo manok keken. Labole, giromo bedo laremi pien nongo i tye ki gin ma oneno dok omaro ki boti calo gituku, ento lurem meno gik woko cut tek gunongo gin ma gimito. Pol kare gin bene pe giparo pi luwotgi, man miyo pe gitamo pi ngo ma ngat moni

romo mito onyo miti-gi mukene i bedo larem. Giromo bedo calo luworo, ento pire tek me niang ni man tyene ni pe gi paro pi ngat mo. Ginongo tek aye me nyutu ne kamaleng.

- **Toolit:** Goro me angwen kakany ki bene me agikki en mako nywako miti ki magoba onyo adwogi mo keken. Kadi bed ni gitye ki miti-gi ma pire tek dok nongo gitye ki diro iye, pe giromo kwanyo kare gi me nywako man kwedi kulu. Iromo ngeyo ne onyo niang i yoo mukene, labole ka latini maro kwano gin acel, onyo ka lapwonye otiti kit ma latini tye ka timo maber kwede i pwonye. Eyo, meno kakare, lutino matye ki goro ni pe dong ni gi timo ma rac adada i kwan. Ento, macalo kwan pol kare obedo gin ma ribbo dano, meno aye miyo ginongo tek.

Goro i kit me lok

- Dul me aryo mako kit goro ma miyo latin bedo kekene, loko kekene ki bene maro bedo laling, loko mapol i kom goro i kit me lok. Labol me acel en aye gale onyo rii ka pwonyo kit me lok. Pe lutino weng gire ento mukene, lutino matye ki goro man cwalo kare malac ka pwonyo kit me lok. Pol kare, gi niang jami weng ma i waco maber adada, ento gitero kare malac me cako lok kit meno. Man pe kwako leb mo keken, ka pwonyo leb mo ongayo latin, ento loko leb anywali ne, ci meno pe nyutu ni latin tye ki goro ni. Ento, wangeyo ni lutino cako lok gi mukwongo manongo nino nywal gi me mwaka me aryo peya oromo. Lutino mukene gicwalo kare malac ka pwonyo lok loyo luwotgi, ento, ka waketo labole, latini tye mwaka abic ento pud pe twero lok, ci pire tek ni myero i tute me niang ngo kikome marac kwede. Pire tek bene ni wiwa myero opo ni man romo bedo tyen lok mapol, goro ma miyo latin bedo kekene, loko kekene ki bene maro bedo laling romo bedo i kine, ento pire tek me niang ki bot daktar/lungec i goro meno aye me moko ada ne. Ka goro man tye matek i kom latin, kare mukene pwonyo lok ngayo woko matwal.
- **Glades:** Me aryo malubu meno, lutino mukene matye ki goro ni ginongo peko i kit me tic ki leb moni. Pe giromo niang i kom carolok ki lok mogo ma tyen lokke okane woko ka i nen ki tiyo kwedgi i lok. Kodi lok meno cung pi gin mapat ki ngo ma nongo ki waco, ento lutino matye ki goro man gubiniang kit ma ki waco kwede ni aye. Labole, ka ki waco ni,

'kot obino ma ayom dene' onyo ni 'myel omako mac ma pe twere'. Lutino matye ki goro ni, obicako yenyo ayom ki kot matye ka cwer woko onyo mac.

- Goro me adek en mako kit kwayi lok ma lutino matye ki goro man romo tic kwede. Gimaro nwoyo lok acel kare ki kare. Labole, gitiyo ki kwayi lok acel me waco gin mo, macalo "ento ba... ento ba..... ento ba". Gubimoko i kom lok acelli dok nwoyo tyen mapol. Wii opo bene ni, pe lutino weng ma timo man nongo gitye ki goro ni, ento ka man tye kacel ki lanyut mogo mapol ci meno romo nyuti yoo ma atir me moko ne ada.
- Goro me angwen malube ki peko i kit me lok bene en aye cako boko lok ki mede kwede anyim. Ka i loko ki latin matye ki goro man, cawa mukene romo bedo calo kweda. Gubigamo lapenyi weng ento pe obipenyi kit peny mo keken onyo cako bene lok. Tic-gi tye me kuru loki ci dong gigamo agama.
- **Toolit:** Me agikki malube ki goro i kit me lok en aye, bedo ki kero me bedo i tuku goga. Man romo nen i cawa me tuku gi, gikwero woko tuku mogo ma mito tam ki timo jami ma pe tye ada, calo poro pito gin mo calo latin, onyo poro bedo ngat mukene. I kare ma wanywako lok i goro ma miyo dano bedo kekene, waloko i kom paro pi lawoti calo gin kikom-gi. Kadi wa i tuku, lutino matye ki goro ni, ginongo tek me poro ne apora keken.

Kit ma pe loke

- Me adek dok me agikki i kin lanyut ma mako goro ma miyo latin bedo kekene, loko kekene ki bene maro bedo laling en aye, kit ma pe lokke. Labol me acel en aye ni, lutino ma tye ki goro man pol kare gimaro nyutu kit acel kare ki kare. Labole, lutino man giromo tuku ki gin acel onyo cal dano acweya pa lutino (ma leb munu lwongo ni toy) onyo gikwanyo me tuku tuku acel ka ginongo kare me tuku-ne. Labol mukene romo bedo tuku ki bongo, calo gonyo ki tweyo jarara i kor bongo. Wiwa myero opo ni wan weng waromo timo man cawa mukene bene, ento lutino matye ki goro ni timo man kare weng.
- **Glades:** Me aryo bene malube ki meno, pol lutino matye ki goro ma miyo latin bedo kekene, loko kekene ki bene maro bedo laling, ginongo tek twatwal me ye aloka-loka.

Aloka loka matidi yelo gi mada ma miyo ginongo tek bene atika me loke kit ma kwo tye kaloke kwede kama wabedo iye. Lutino man gimaro lubu cik/yub, man miyo ginongo tek twatwal dok cwero cwinygi me loke ka lubu gin manyen ma pe guyube pire. Labole, ka gitye i ot kwan, giromo bedo ki kabedo acel mo ma gityo kwede pol kare. Ka gunongo ngat mo obedo woko kakenyo, gubimito ni ngat meno oa woko me ka gin me yenyo kabedo mukene. Ka gwok i nen wutye kadak i kabedo manyen kun latin wu acel gwok tye ki goro man, latin man obibedo laling ma nongo wiye onywene woko pi kare meno me dakki. Gimaro ka jami weng obedo kit ma dong tye kwede.

- **Jami mabeco**

Toolit: I kom goro ma lutino ma gitye ki goro ma miyo latin bedo kekene, loko kekene ki bene maro bedo laling kato ki iye, gin bene gitye ki teko-gi ma myero wiwa pe owil me lok iye, kun nongo wapwoyo bene ni gitye ki kero me kwan macalo lutino mukene.

- Mukwongo, malube ki kabedo mo keken, bedo dano ma lagen tye gin ma pire tek, Lutino matye ki goro ma miyo latin bedo kekene, loko kekene ki bene maro bedo laling, pol kare giloko lok ada keken labongo paro pi gin mo. Pe gimaro loko lok goba, pol kare giloko ngo ma tye ada kit macalo ginongo tek mada me poro gin mo apora ni. Labole, ka guneno i tyero kikopo onyo cwan ki gang, gubiwaco lok ada kikome ki anga ma otimo. Ki bene, ka i ruku bongo dok pe nen mwonya, gin waci woko atyer kamaleng ni pe i nen mwonya i bongo eno ni. Pol kare dano pe pwoyo man pien gitamo nongo ni lok gi ni konye peke, ento pire bene bedo tek ka wapwoyo lok ada gi ni.
- Me medo i kom meno, lutino mukene matye ki goro man gi ryek mada dok gitye ki diro mapol. Pol kare giketo cwiny-gi ki tam-gi ducu ka timo jami ma gimaro twatwal. Labole, ka gimaro kwano jami ma mako tam ki tic nyonyo mapatpat onyo (Sciences), gubitimo meno makato jami mukene ma gikwano ducu. Waromo bene neno mukene ka i nen gimaro goyo cal kun nongo gikati ki cal jami ma mwonya mada. Wiwa myero opo ni, pe dong ni lutino weng ma tye ki mic ki diro mapatpat ki tye ki goroni, ki bene pe lutino weng/dano weng matye ki goro ni gitye ki mic ki diro mapatpat.

- Glades: Lanyut mabeco mukene ma lutino matye ki goro ni tye kwede en aye malube ki miti-gi pol kare. Ka miti-gi tye i gin mo, gitute me ngeyo lok ducu ma mako gin meno kun nongo gitamo bene ni giromo ngeyo jami ducu ma mitte i kom gin meno labongo ngati mo waco bot gi ni gutim kit meno. Ka gumaro goyo cal, gubiyenyo lok ducu ma mako cal moni, ngat ma ogoyo ki kit me goyo cal mapatpat gin kikom-gi. Gimaro kit jami macalo man mada dok cwiny-gi maro gak iye cawa weng. Pol kare gubiketo cwiny-gi ki tamgi matek i kom miti-gi kakany man miyo ki nongo ngec mapol me timo ne maber adada.
- Me agikki ne, ki cik mapatpat matye i gang kwan, lutino ma tye ki goro man pol kare gi lubu cike magi mada. Ka gimaro gin ma miti-gi tye me timo, gitimo oyot dok maber adada ma cawa pe ngolo gi kulu. Pol kare ki tute matek pe me turu cike dok cwiny-gi cwer mada ka dano mukene oturu cike mo keken.
- **Ngo ma kelo goro ni ki lok kigeng mogo.**

Toolit: Kit ma dong waloko i kom kwayi lanyut mapatpat ki bene jami mabeco ma lutino matye ki goro ni romo timo ne. Tye jami mapol ma kelo goro ni ki bene lok mogo ma pe kelo ada i kom goro man ma dano waco gi ento amito atit bot-wu ni. Angeyo ni kwayi lok magi romo kelo bura i gangi kwan wa i kabedo ma orumu wa bene. Kong mukwongo, ka wanywako jami ducu ma kelo goro ni, amito wange ni kit ma lunywal gwoko ki latin i yoo ducu pe kelo goro man. Tye lutino mukene ma luyondo gi ogwoko gi dok opwonyo gi maber atika ento pud gitye ki goro ni. Pe waromo kok i kom ngati mo, latin onyo wa jo ma gwoko latin bene kit mo keken.

Goro man pe alam onyo tyet aye kelo. Labole, lok romo winye ni goro man obedo alam ki bot ngat mo. Man pe kakare, dok amito miyo tam ki wan pe me lubu onyo cung i kom lok magi kun pe waweko lutyet ki wegi yadi tekwaro okwal wa. Goro man pe obedo alam, ento ki kony ducu ma aa ki gang, gang kwan, ki bot ludiro mukene matiyo i kom goro mapatpat, lutino matye ki goro man romo bedo ki kero me kwan dok kwo ki goro man maber.

Me adek malubu meno bene, agwera pe kelo goro man. Man obedo lok goba ma lunywal mapol winyo ki i but lobo mapatpat i wilobo dok pe tye lok ada. Ci pi man amiyo tam bot lunywal matye ka winyo dul lwod me pwonye man me cwalo lutino gi ka gwere kit ma mite kwede.

Gin ma wangenyoo en aye ni goro man, macalo goro mukene ducu ma yelo lutino i kare me kwan, aa ki i wic/adam ki kit ma wic/adam tiyo kwede. Wangenyo bene ni man bino nia i gang moni, latin romo nongo goro man nia i kom lanywal onyo kwaro ne ki i dog gang meno. Kit ma wic/adam dongo kwede pol kare romo bedo peko ma aa ki bot lunnywal ki ngo ma otime i kare me yaco. Gin ma pud kikweda tye ka timi iye en aye kit ma gin kelo kwede jami magi i wii latin ma tye ki goro man. Man obedo gin ma niange pud tek dok luryeko mapol tye ka timo kikweda/kwed mapatpat iye. Dong kwed mogo nyutu kamaleng ni byek mogo i kom jami ma kelo goro ni pe tye ada, labole calo ngo ma abedo ka lok iye ni, ento pud peya gunongo ngo kikome ma kelo goro man.

- **Kit me konyo lutino matye ki goro ni**

Glades: Macalo dul, ki bot-wa i Backup Uganda, watye ka miyo ngec ki dongo oduru bene ni wan ducu mito wapwoyo lutino malube ki kit mic ango ma gitye kwede, magi gin aye, niang miti gi ki cung kwedgi i kom goro mapatpat matye ka yelo gi i kwan. Tye yoo mapol ma lunnyodo, lupwonye ki lwak ducu ma i kabedo acel acel romo konyo kwede ki lutino me bedo agonya ki nywako kacel ki luwot-gi ki gang wa i gang kwan bene ka i nen ki niang ni gitye ki goro man.

Mukwongo, pire tek pe me diyo latin matye ki goro man me tuku ki luwote. Ento, makato ka i penyo miti gi ki bene me kati ki jami mogo onyo tuku ma romo weko gi winyo agonya i cawa me tuku, kun nongo wii myero opo ni lutino man maro bedo ken-gi labongo dic me paro bedo ki luwot-gi. Labole, giromo kato ki tam me galo wang-gi ki neno cal ki i nyonyo lagal wang/TV ka ce gimaro, me ka diyo gi me tuku odilo ki luwot-gi. Ka malube ki gang kwan, i romo kati ki tuku mogo ma pe romo diyo gi me tuku kacel ki luwot-gi mapol. Ento, man pe tyen lokke ni dong pe opore me miyo gi kare me tuku ki luwot-gi. Amito anywo doki ni diyo gi pe romo bedo yoo ma opore.

Ki bene, macalo lanyodo, i romo lok ki lutino mukene ma i gang, lutino pa jirani kadi lupwonye bene kit ma myero gubed kwede ki latin man. Man obikonyo mada latin matye ki goro ni me ngeyo en bene ki marre ki bene dano niang en, dok man konyo me gengo ayela ki bot lutino mukene. Labole, i romo miyo gi yoo ango ma giromo tic kwede me weko latin man bene tuku ki luwote labongo gin winyo marac, i romo waco botgi ni pe gugud kome i cawa me tuku onyo guti ki leb mogo ma pe opore. Lupwonye bene bibedo ki kero me pwonyo latini maber ka gingeoyo

maber ni latin moni tye ki goro man. Dok bene, macalo lapwony, i romo tito bot lutino kwan yoo ango ma giromo bedo onyo nywako tuku ki jami mukene ki lutino matye ki goro man labongo weko gi bedo kic kic.

Toolit: Kono i tye layondo onyo lapwony, i romo weko latin matye ki goro man winyo agonya ka i nen jami ducu ki gang wa i gang kwan bedo kit ma mite kwede. Tute me kati ki yub ma i goyo kore ki kore pi nino ducu pi lupaco ki ot kwan dok wek jami ma i ot ma gang ki ot kwan obed i kabedo acel, ma mako bene jami pa latin matye ki goro man ki lutino mukene. Man konyo gi me ngeyo ngo ma obitimo malubu ki bene man weko gi bedo agonya. Wii myero opo ni, lutino man pe maro jami matime atura, pi meno myero i yub but ot kwan obed kama romo tuku, man konyo gi mada me bedo kumeno. Ka i nen i mito loko meno woko, pire tek ni i nywak kwedgi ngo ma obitime. I romo weko gin bene bedo i timo aloka loka man calo yubu ka tuku i but ot tung cel onyo gin mukene bene. Ka i nen i tye ki kama wugwoko iye bongo macol ki maleng ki gang, labole ka i tye ki aduku lagwok bongo aryo mapatpat, pe i rub gi atata onyo i kop kakare woko kono ka i nen i nywako kong kwedgi maber. Ka i nen i tye kadak woko ki i gang macon me cito i manyen, lok kong ki latin macalo man pire con. Man romo nen calo gin matidi ki bot wan mukene, ento, bot latin matye ki goro ni, romo bedo i loko wilobo woko kulu ki bot-gi. Ka i ngeyo ni gin mo madit manyen obitime ma latini pe obingeyo, lok ki latin pire con wek en oyube bene.

Ki bene, tute pe me tic ki leb onyo lok mogo ma tyen-gi okane woko calo carolok ka i tye ka lok ki latin matye ki goro ni. Ka i tiyo kwede, giromo niang i yoo mapat ki i kom ngo kikome ma i tye ka waco. Ka wiwa pud poo i kom labol mogo ma okato calo, 'Ot tye ka wang'... latin matye ki goro ni, obicako yenyo mac cut, onyo ni, 'kot tye ka cwer ma ayom dene'... latin matye ki goro ni obikato woko ka neno ka ayom tye ka poto ki i pol. Tic ki lok mogo calo, 'pinye tin lyet ku', kun nongo piny tye mangic aye matek. Man tek mada ki latin matte ki goro ni me niang, twora i wac kom ngo kikome i yoo ma atir maniange oyot.

Glades: Diro me agiki botwu, ka i mito konyo lutino matye ki goro ni, mini gi kare me dongo ngec gi me bedo ki dano. Pien ni gi yele kwede, pe dong nyutu ni pe giromo pwonye matwal. Iromo timo jami mapatpat marom ki nywaku tam ki dano mukene ki lok bene. Iromo cako boko lok i yoo me tuku, kama i waco gi gin mo, ci latin romo yero lok awaca i kin jami ma nongo i



Gulu, Uganda / Zwolle, The Netherlands

E-mail: info@backupuganda.org

Web: www.backupuganda.org

Tel: UG +256 7 72630078 NL +31 38 4604615

coyo. Iromo bedo ki kare me weko gi nwoyo byeko ka ngat mo cwinye yom onyo okeco kwed gi. Labole, i romo nyutu ci i penyo latin, tyen lokke niange ni ngo, nyo bene i romo waco yomcwiny onyo keco ci i penyo latin me temo nyutu ne ki tung wang gi onyo ki kom gi keken. i romo mede ki doro gi i kit me tuku ki luwot-gi onyo lurem gi, ka ka i nywako tam ki ngat acel keken i acaki. Pol kare konyo mada ka i pwoyo gi pi tic gi, ka i tye ngat ma miyo kare bot gi dok i cuku cwiny-gi me tute me temo ne kare weng malube ki goro ma gitye kwede.

Toolit: Wapwoyo winyo dul lwod me pwonye wa me abic me lutino weng romo pwonye, kama wanywako matut i kom kit/lanyut ma kwako goro ma miyo latin bedo kekene, loko kekene ki bene maro bedo laling ki yoo ducu ma romo konyo lutino matye ki goro ni wek gukwan. Cwiny-wa yom me nywako kwed-wu i dul lwod me pwonye wa me abicel ma obiloko i kom kit goro ma mako kit kwo pa dano i gang ki gang kwan.

Glades: Wapwoyo winyo dul lwod me pwonye wa me **Lutino weng romo pwonye**. Iromo nywaku tami kwed wa! Iromo ribbe/kube kwedwa in facebook onyo i romo cwalo lapeny i namba cim 0772630078. I mito ngeyo matut i kom dul me Backup Uganda, wek i bed ki ngec i kom jami ma time? i romo nongo wa ki wiyamo me **internet** matye i wang **website** wa ma kilwongo ni www.backupuganda.org ki bene wu romo lubu wa i facebook, instagram, twitter ki bene i linkedin.